

## Abraham & CO.



Abraham u Lot  
ässe zämen e Chrott  
Abraham het no nid gnue  
u frisst am Lot sy Sundigschue  
lala lalala lala lala  
lala

Abraham und Isak  
blasen in e Papyrsack  
Abraham seit: "Auso doch,  
dä chlepft nümm, dä het es Loch."

Dr Noah i syr Arche  
erwachtet mau vom Schnarche,  
da rüeft sy Frou: "Schlaf wyter,  
dr Wätterbricht isch schitter! "

Isebel und Achab  
rütschen über ds Dach ab,  
dunge rüeft dr Dänu:  
"Obacht, dert fäut dr Chänu! "

Abraham und Enoch  
loufen über ds Bschüttloch,  
Bschüttlochlade chrachet,  
hähä, Isak lachet.

Belsazar u Kambyses  
trinke zämen es Chlyses,  
am Tisch drnäbe dr Moses  
bschteut für sich es Grosses.

Ruben und Manasse  
berchöme Krach bim Jasse,  
derwylen isch dr Lazarus  
mit de Stöck scho lengschtens duss.

Wo si uf Jericho  
a Ggöppfinau sy cho,  
da git Sodom Gomorra  
vier zu eis uf d'Schnorra

Lot und Abraham  
fahre hei im Tram,  
da seit dr Lot "E lue,  
wo isch itz my Sundigschue? "